

## **ԹՌՉՈՒՆԻ ՄՏԱՆՄՈՒՆՔԸ**

Ես ապրում էի մի փոքրիկ տան մեջ  
Առատ ու անփուլթ,  
Աշխարհքն ինձ համար կըլոր էր անվերջ,  
Կեղևը կապույտ:

5 Նըրանից հետո աչքըս բաց արի  
Մի փոքրիկ բընում,  
Տեսա՝ աշխարհքը հարդից է շինած,  
Ու մայրս է շինում:

Մի օր էլ, բընից գըլուխս հանած,  
10 Նայում եմ դես-դեն,  
Տեսնեմ՝ աշխարհքը տերևից շինած,  
Մեր բունը վըրեն:

Հիմի թըռչում եմ հեռո՛ւ, շատ հեռո՛ւ,  
Ամեն տեղ գընում,  
15 Բայց թե աշխարհքը ինչի՞ց է շինած —  
էլ չեմ հասկանում: